

Radunanza de la Lia ladines da mont

N centené de sozi de la lies CAI SAT de duta la valèda ladines, da Ampez, Fodom, Fascia, Gherdena e Badia, é rué sun Rodela per la 17^a scontrèda



I sozi de la Lies da Mont de la Ladinia à tout pèrt a la messa ofizièda da Don Pietro Rossi aló da la cèsa da mont Des Alpes te la 17^a scontrèda de la Lia da mont ladines.

En domenia passèda sun Rodela, per endrez de la Lia da mont fascèna de la Val de Sora, vidèda dal president Evaristo Soraruf da Ciampedel, l'é stat endrezà aló da la cèsa da mont Des Alpes la radunanza de la Lia ladines da mont.

La lies da mont l'é sociazions de voluntadives che se cruzia de tegnir sù e slarièr fora l'amor per la mont, ensema co la amministrazions les met vèrda e les laora per comeder ite i vièi e i troes da mont, e podon recordèr che la lies fascèna de la val de sora, de la val de sot e de Moena les à dat na gran man per meter ju la mapes endrezèdes dal Comprenjorie Ladin de Fascia.

Sun Rodela donca l'é ruà n centené de sozi de la lies CAI SAT de duta la valèda ladines, da Ampez, Fodom, Fascia, Gherdena e Badia, zachei é rué su co la forenada, che la é stata metuda a la leta per nia da man de la SITC de Cianacei, etres enveze i é rué su a pé, vegnan ca da Sela, duc sessaben moec via da l'amor che i à per la mont, la voa de stèr ensema e se passèr na bela giornèda en bona compagnia e con legrezza.

Da les 11 defora da la cèsa da mont Don Pietro Rossi l'à ofizià la Senta Messa e sessaben che colassù, te anter la più bela crepes, Saslonch, Rodela, Sela, Pordo, Marmolèda, aló l'cher l'era amò più vejn al Ciel e la lauda al Signore die la se à uzà per ladin e per talian, l'é stat sport n fort deelpai al Creator per l maraveous raion da mont che l ne à donà e metù te man, e l'é stat domanà la grazia de stèr ascorc a no l roinèr e soraldut de esser bogn del vardèr via.

Dò la Senta Messa l'é stat portà dant n salut da man de l'autoritèdes de comun de vèlch paisc e dapò di presidenc de la Lia ladines che les à palesà aprijiamet per l'endrez de chesta giornèda, che recordon la vegn fata duc i egn te n auter post de la Ladinia. A duc i presidenc ge stat dat n bel chèder del grignolent pop "Scedola" fat da l'artist fascian Manuel Riz da Cianacei.

Dò duc chenc se à tramudà daite,

contenc de poder se n jir al ciaut e ence famé donca duc verties per se goder la bona marena, endrezèda dal patron de la cèsa da mont Des Alpes, Ezio Croce e l'é da dir che l'é stat slapà sù dut cant.

Domesdi l'era pervedù che vegne fat n convegn en cont al fat che la Lies da mont à sozi semper più de età, e veder per coluna rejon che i joegn no se scrif più ite.

L'é na costion chela di joegn che la tocia en maniera desvaliva la lies da mont, vèlch una padesc de più, autres à amò vèlch joen che se scrif ite e ge volessa portèr inant scomenzadives che engaisse la joentù a se fèr sozio.

En cont de ches te Fascia l'é Paolo Lastei da Poza che se desc ju per slarièr fora anter la joentù l'amor per la mont e l'envia a se scriver ite a la lies da mont.

Fosc la giornèda, l post e l moment no i era giusé per chesta costion, donca no l'é stat l met de fèr l convegn, se confronter e se rejonèr fora, aboncont chesta costion la vegnarà rejonèda fora te n auter moment con desvaliva lies.

Per l rest la giornèda la é stata bela e domesdi mingol a l'outa, dò se aer saludà, i sozi de la Lia ladines da mont i se n'à arloà dò sie vièl per se n jir a cèsa, co l'emprometuda sessaben de se troèr endò l'an che vegn, per n altra scontrèda amò più bela, che n auter an la sarà a Reba.

Annelise Vian (Radio Studio Record)



17 SCONTRÈDA DE LA LIA LADINES DA MONT
21/6/2009 Col Rodela Ciampedel
Sez. CAI SAT AUTA VAL DE FASCIA



Ai raprejentanc de duta la Lies ladines ge é stat sport n chèder con sù l "pop da mont" dessegnà da Manuel Riz per chesta ocasion.